

大乘阿毗達磨雜集論述記卷第二十

唐京兆大慈恩寺沙門窺基撰

如世尊說有情業異熟不可思議如是經意非一切種皆不可思議云何業異熟不可思議云何可思議謂諸善業於人天趣得可愛異熟是可思議諸不善業墮三惡趣得不愛異熟是可思議由善惡業往善惡趣感得可愛不可愛異熟世間智者能思議故由此能引發正見等功德故卽由此業感諸有情自身異熟等種種差別不可思議謂內身等異熟有形色等無量差別難可思議除一切智不能思議強思議

者發狂等過故。復次卽善不善業處差別。事差別。因差別。異熟差別。品類差別等。皆不可思議。由卽此業處差別等無量無邊難可思議故。處者謂住如是處。造如是業。或於城邑。或於村落。如是等。事者謂所依事。或有情數。或非有情數。因者謂善不善根。如其所應。異熟者謂異熟內身。品類者謂種種差別無量品類。又有種種外事差別。能感業用不可思議。由何等業感棘刺等鋒鋸利。如是等類。墮在世間不思議攝思議世間佛所制故。又末尼珠藥草呪術相應業用不可思議。末尼相應業者謂月愛珠等能出水等。

業用難思。藥相應業者謂執持此藥藏隱形等。呪相應業者謂誦此呪便不燒等。術相應業者謂由彼彼術故治熱病等。

如世尊說有情業異熟不思議。下業中大文第三明可思議不可思議等業。於中有二。初解世間後解出世間。世間中有三。一解業異熟果。二解外增上果。三解末尼等世事。

初解業異熟中有二。初釋經業異熟不可思議後處等不可思議。初中復二。初舉經後正釋。

又諸觀行者威德業用不可思議云何。彼心威德力。

故能動大地升虛空等。又諸菩薩自在業用不可思議。所謂命自在故。心自在故。財自在故。業自在故。生自在故。勝解自在故。願自在故。神通自在故。智自在故。法自在故。諸大菩薩由如是等自在力故。所作業用不可思議。謂諸菩薩由命自在力。持諸壽行。隨所欲樂。爾所時住。由心自在力。隨其所樂。於三摩地入出自在。由勝解自在力。轉大地等爲水火等。勝解自在。由願自在力。隨其所樂。能引無數自利利他圓滿大願。由神通自在力。爲欲攝化無量有情。顯示種種神通變現。由智自在力。於諸法義。訓釋言詞。無滯辯

說圓滿究竟。由法自在力。以無量種名句文身。建立素怛纜等。無上教法。隨其所應。乃至一切有情。於一時。閒能令彼心皆大歡喜。又一切佛所作。諸佛應所作事業。用不可思議。云何如來到於究竟無功用處。證得清淨一味法界。諸佛世尊之所應作。利益安樂。諸有情事。隨時如應。皆能成立。如是諸佛及佛境界。不可思議。

出世閒中有三。初明二乘等十八變。次明菩薩等十自在。後明佛所作等。

十自在。以五門分別。一出體。既以六度爲因。準依

無性第九并以後得智爲性。彼釋智自在云。謂隨所有種種言音現在前故。故知唯後得。若準天親第九釋智自在云。謂通了知一切爾燄名智自在。爾燄卽通真如故。此論又云。由智自在力於諸法義等圓滿究竟。旣於義究竟故。準二論可通正智。餘九事慧。此一通事理二慧。無性依隨欲而說法。故唯取辭無礙。解智爲智自在。天親依要達境遣而方空故。取二智爲智自在。此論依成四礙解後方說法亦通二智。理不相違。此通事出體。其別出體。其命財業生通法六。說以後智爲性。其心一種。

依天親論。彼謂於生死時無染汗。唯以心爲體。不被染故。此論唯以定爲體。於三摩地入出自在。故無性通以心定二法爲體。故彼論云。謂於生死無染卽心也。又隨意樂能正爲他。引攝眾具於中。自在運轉。其心卽心卽定也。或無性意亦唯取心。唯此論取定合二爲體。其勝解如名爲體。願以欲解二爲體。智自在者。如通出體。二釋名者。命財業生法。五俱說爲名。依主釋。餘五持業。若取智爲體。唯通智二種持業。餘八依主。三辨相。此論解智勝解神通法四種。與諸論不差。心自在者。此論據定能

持心從所依爲名。天親無性。心體不染。財自在者。引攝眾具資生什物。天親云於食等十種眾具自在。業自在者。謂於諸業得大自在。唯作善業。非惡無記。及於其中勸他作故。天親云業生二種。謂此能攝彼能生因及所生果故。由身語業自在而轉。隨所欲生業現前故。生自在者。隨欲往諸趣生故。唯業一種二類不同。一天親之論。乃說菩薩更作業。此意乃非說異熟因。但由作漏無漏業故。不爲生死業煩惱所拘。或二。正由佛唯作無漏善業。業者佛之作用。以說財生與無性不別。唯願自在。天

親無性。皆云由昔精進。隨所作究竟故。於今時所願皆得。此論乃以大願引願。謂彼二論依願遂心。此論據願遂願。願遂願故。說皆遂心。遂心者。由願遂願故。又彼二依佛願自在。此說菩薩故。不相違。唯智自在。三論不同。如出體中已辨其相。第四明因。初三施因。法無畏財施次第配。次二戒因。後二智因。中三。如名攝論第九說。第五問答分別。問。何故攝論說佛具十自在。何故此中說菩薩得彼約圓成。此說分得。若據少分。初地卽得。若據彼彼增。隨地亦差別。初地雖得。未名自在。義少分得。四相

業智自在是何所攝。又何故說第八地得此唯二名非法身起自門故。問何故唯說十自在。十地論云。治十怖畏故。命對死畏。心對煩惱畏。財對貧窮畏。生對惡道畏。願對求不得畏。勝解治謗法畏。此義稍難。神通對追求時縛畏。智治處眾畏。法治疑畏。又五相故。六度三自在。謂器眾正覺正知自在。又五無量與此相攝。并如十地論問。十地中幾有漏無漏。問曰。十自在依何地有。如何修習。幾自利利他報地具幾。一一應通。智自在中法義訓詞。卽四無礙解也。

復次。如是集諦總有四種行相。所謂因相。集相。生相。緣相。因相云何。謂能引發後有習氣。因是名。因相由業煩惱是能引發。後有習氣。因故。集相云何。謂彼彼有情所集習氣。於彼彼有情類爲等起。因是名。集相由諸有情所集習氣。於人天等有情類中能爲相似形貌。種類平等起。因故。生相云何。謂各別內身無量品類差別。生因是名。生相是諸有情各別內身相續決定。趣生地等所有一切品類差別。乃至有頂生因故。緣相云何。謂諸有情別別得捨。因是名。緣相能令有情得未曾得自體。捨已曾得自體故。如是名爲集

諦體相。

集諦何故說四行。五十六治。四種愛故。謂我常樂淨。初二別治。後二通治。

云何滅諦。謂由相故。甚深故。世俗故。勝義故。不圓滿。故圓滿故。無莊嚴故。有莊嚴故。有餘故。無餘故。最勝。故差別故。分別滅諦。

滅諦中分六。一辨體。二明深。三假實。四因果。五勝劣。六根本。

相者。謂眞如。聖道。煩惱不生。若滅依。若能滅。若滅性。是滅諦相。如世尊說。眼耳及與鼻舌身。及與意。於此

處。名色究竟滅。無餘。又說是故。汝今當觀。是處所謂。此處眼究竟滅。遠離色想。乃至意究竟滅。遠離法想。由此道理。顯示所緣眞如境上。有漏法滅。是滅諦相。攝異門分。及本地思慧地解。名色滅無餘。卽通三依因。十七釋別名。

甚深者。謂彼諸行究竟寂滅。如是寂滅。望彼諸行。不可說異。不異。亦異。亦不異。非異。非不異。所以者何。若彼諸行。究竟寂滅。如是寂滅。與彼諸行。可說異者。應與諸行。不相繫屬。條然異體。若不異者。應是染相。由此道理。非俱。非不俱。何以故。無戲論故。於此義中。若

生戲論非正思議非道非如亦非善巧方便思故如世尊說此六觸處盡離欲滅寂靜沒等若謂有異無異亦有異亦無異非有異非無異者於無戲論便生戲論乃至有六處可有諸戲論六處既滅絕諸戲論卽是涅槃若於如是絕諸戲論寂滅涅槃不正思議是名戲論於應異思議乃異思議故云何應異思議謂上妙離等種種思議。

甚深中勘六十八等執異耶增執過不異耶分別自相過互俱句雜亂過俱非損滅過於中文有二初出體後如是下解釋中分三初總顯非四句次

所以者何下釋後如世尊說引證。

第二釋中初釋師解後本論解。

世俗者謂以世間道摧伏種子所得滅是故世尊別名說爲彼分涅槃勝義者謂以聖慧永拔種子所得滅不圓滿者謂諸有學或預流果攝或一來果攝或不還果攝等所有滅圓滿者謂諸無學阿羅漢果攝等所有滅無莊嚴者謂慧解脫阿羅漢所有滅無三明明等最勝功德所莊嚴故有莊嚴者謂俱分解脫三明明六通阿羅漢等所有滅有無量種最勝功德所莊嚴故有餘者謂有餘依滅無餘者謂無餘依滅最勝

者謂佛菩薩無住涅槃攝所有滅以常安住一切有情利樂事故差別者謂無餘永斷永出永吐盡離欲滅寂靜沒等。

差別中有二初舉經後別釋。

何故名無餘永斷由餘句故謂無餘永斷是標句餘是釋句是故說言由餘句故由後別句釋此總故纏及隨眠皆悉永斷故名無餘永斷。

別釋中有二初釋標句後釋別句。

何故名永出永出諸纏故此依斷諸纏說謂已生者皆遠離故何故名永吐永吐隨眠故此依斷隨眠說

謂除根本永不生故如是諸滅由見修道對治別故建立二種盡及離欲故次問言何故名盡見道對治得離繫故煩惱聚中餘少分故亦名為盡何故名離欲修道對治得離繫故由彼修道離諸地欲漸次所顯故名離欲由有如是俱離繫故當來苦滅故次問言何故名滅當來彼果苦不生故能成未來苦不生法故名爲滅又於現法憂惱寂靜故次問言何故名寂靜於現法中彼果心苦永不生故何故名沒餘所有事永滅沒故宿業煩惱所感諸蘊自然滅盡故名爲沒由如是等別句釋前無餘永滅總句。

別句中分三。初七依所滅辨名差別。

何故此滅復名無爲離三相故。生滅住異三有爲相究竟相違故名無爲。何故此滅復名難見。超過肉眼天眼境故。唯聖慧眼所行境界故名難見。何故此滅復名不轉。永離諸趣差別轉故。離那落迦等往來流轉恆常安住故名不轉。何故此滅名不卑屈。離三愛故。永離欲色無色三愛於諸有中無所卑屈故名不卑屈。何故此滅復名甘露離蘊魔故。永離一切死所依蘊故名甘露。何故此滅復名無漏。永離一切煩惱魔故。何故此滅復名舍宅。無罪喜樂所依事故。解脫

喜樂所依止故名舍宅。何故此滅復名洲渚。三界隔絕故。於生死大海挺出高原故。譬洲渚。何故此滅復名弘濟。能遮一切大苦災橫故。證得此滅。生老病等諸苦災橫永遠離故。何故此滅復名歸依。無有虛妄意樂加行所依處故。由於彼滅所發意樂及正加行無虛妄性所依處故。所依止義是歸依義。何故此滅名勝歸趣。能爲歸趣一切最勝聖性所依處故。由此寂滅能爲歸趣最勝聖性所依止處。是阿羅漢證得加行所緣境故。何故此滅復名不死。永離生故。諸無生者必不死故。何故此滅名無熱惱。永離一切煩惱

熱故。永離一切求不得苦。大熱惱故。何故此滅名無熾然。永離一切愁歎憂苦諸惱亂故。一切愁等熾然永息。極清涼故。名無熾然。何故此滅復名安隱。離怖畏住所依處故。無老病死等一切怖畏。聖住所依故名安隱。何故此滅復名清涼。諸利益事所依處故。一切清涼善法所依故名清涼。何故此滅復名樂事。第一義樂事故。出世間樂所依事故。名樂事。何故此滅名趣吉祥。爲證得彼易修加行所依處故。爲證涅槃易修加行所緣境故。何故此滅復名無病。永離一切障礙病故。離煩惱等諸障礙病故名無病。何故此滅

復名不動。永離一切散動故。離諸境界戲論散動故名不動。何故此滅復名涅槃。無相寂滅。大安樂住所依處故。永離一切色等諸想。究竟寂滅。大安樂住所緣境故名爲涅槃。

次二十一名釋自通名。

復次。依滅諦辯無生等名義差別。與苦諦相義相違故。苦諦相者。於彼彼處有情類中相續而生。爲翻彼相是故。問言何故此滅復名無生。離相續生故。苦諦相者。續生已後。自身眾分漸次圓滿。爲翻彼相是故。問言何故此滅復名無起。永離此後漸生起故。苦諦

相者宿業煩惱勢力所造爲翻彼相是故問言何故此滅復名無造永離前際諸業煩惱勢力所引故又現在苦是能造作餘有異熟諸業煩惱所依止處爲翻彼相是故問言何故此滅復名無作不作現在諸業煩惱所依處故又苦相者後有異熟相續生起無有閒斷爲翻彼相是故問言何故此滅復名不生永離未來相續生故。

後五對苦諦辨名八十三下廣解別名。

復次滅諦有四種相謂滅相靜相妙相離相何故名滅相煩惱離繫故謂流轉因煩惱離繫故名滅何故

名靜相苦離繫故行苦所攝不寂靜相取蘊離繫故名靜何故名妙相樂淨事故諸煩惱苦究竟離繫自然樂淨以爲自體故名妙何故名離相常利益事故不復退還最極安隱如其次第名常利益安隱利益最勝善性是滅諦相。

五十五解四行由滅集諦四愛故緣起下同此第三唯樂淨第四唯常初二離繫卽義此滅苦集亦所顯故彼唯依滅苦無餘所依瑜伽此中間答常無常如論瑜伽云問諸行寂滅是滅諦耶設是滅諦諸行寂滅耶答若是滅諦亦諸行寂滅有諸行

寂滅非滅諦。謂由無常滅故。非擇滅故。諸行寂滅。問。若此滅諦先無。後有云何。是常。若常時有何不。一切有情於一切時。般涅槃耶。答。不流轉相不現。行相是滅諦相。此諦云何。先無後有。又無生相無。滅相是常相。滅諦亦爾。是故名常。若有證得一切。麤重永息滅者。彼般涅槃。若未證得者。彼不般涅槃。有滅諦故。諸有情類有證得者。是故般涅槃。是證所顯。非生所顯。

云何道諦。謂由此道故。知苦斷集證滅修道。是略說道諦相。今於此中依四聖諦。以其作用顯道體相。

明道諦中有二。初問。次答。後釋四行。答中有二。初略行相作用顯之後。依位顯體。

知苦斷集證滅修道者。五十五云。由彼苦諦是四顛倒所依處故。爲除顛倒故。徧知苦。旣徧知苦。今徧知集。由彼集諦苦諦攝故。雖徧知苦。仍爲集諦之所隨逐。故須更說永斷集諦。除彼因種苦永無。故言觸證者是現見義。由於滅諦現前見故。不生怖畏愛樂攝受。是故次說觸證滅諦。勤欲觸證。若勤修道。乃能承辦。所說三義。是故後說修習道諦。此說入道觀諦所因。及其所由。集滅彼苦滅唯由。

道故證於滅。今者顯道諦有此作用也。

又道有五種。謂資糧道。加行道。見道。修道。究竟道。如是五種。依道自性及眷屬以顯道諦差別。

明五種道為道諦中。初列五名。後隨別釋。

資糧道者。謂諸異生。所有尸羅。守護根門。飲食知量。初夜後夜。嘗不睡眠。勤修止觀。正知而住。復有所餘。進習諸善。聞思修所生慧。修習此故。得成現觀。解脫所依器性。謂諸異生。所有尸羅。乃至正知而住等。是資糧道體。由彼修習淨尸羅等。極圓滿故。復有所餘。進習諸善者。謂無悔等。由聞思等所生諸慧。得成煖

等次第見諦。永斷諸障。相續堪任性。

此中所說資糧道者。謂諸異生。所有尸羅。守護根門等者。瑜伽二十一。聲聞地。初說有非菩薩性。遇二種緣。一勝。二劣。勝緣者。謂正法。增上他音。及內如理作意。劣緣者。謂若自圓滿。若善法欲。若正出家。若戒律儀。若根律儀。若於食知量。若初夜後夜。常勤修習。覺寤。瑜伽若正知而住。若樂遠離。若清淨諸蓋。若依三摩地。自圓滿。中有五句。一善得人

身。

男女

二生於聖處。

中國

三諸根無缺。

不長短。不瘡癩等。

四勝處淨信。

勝處。正法也。淨信。於此起信。能除一切煩惱垢故。

五離諸業

障。謂遠離五無間業等。若隨有一作及增長。現生不得入聖故。上之五種名自

圓滿。他圓滿者亦有五句。一諸佛出世。二說正法

教。謂四諦教。三法教久住。佛在及後正法未隱。四法住隨轉。證者

以法授誠。五他所哀愍。施主於行者起施等心。此上五句名他圓

滿。自他圓滿為緣起善法欲戒根律儀等十句也。

一善法欲者。既聞正法獲得淨信。起厭捨妻子心

形趣於非家。勤修正行。令得圓滿。生如是欲。二正

出家。白四羯磨受勤策戒等。三戒律儀。出家已堅

牢防護。別解脫律儀。乃至六支。四根律儀。從此尸

羅守護正念。修常委念。以念防心。行平等位。眼見

色已而不取相。不取隨好。恣心漏泄。惡不善故等。

五食知量。不為倡蕩。憍逸。飾好端嚴。食於所食。以

正思擇為身安住支持。除飢渴攝梵行。斷故受。令

新受不生。為養存力樂無罪安穩而住。六初夜後

夜常勤修習覺寤。瑜伽晝日分經行。冥坐二種威

儀。從順障法淨修其心。初夜亦爾。過此分已。出住

處外洗濯其足。右脇而臥。重累其足。住光明想。正

念。正知思惟起想。後夜分亦爾。二種威儀淨修其

心。七正知而住。若往止住。觀瞻屈申。持衣鉢。食飲

噉嘗。行住坐臥。悟寤之時。語默解勞。睡時皆正知。

住。八樂遠離遠離一切臥具等貪住阿練若樹下
空室山谷等乃至平野邊際臥具。九清淨諸蓋謂
於五蓋淨修心已。心離諸蓋安住堅善勝三摩地。
十依三摩地謂斷蓋已離心隨煩惱惡不善有尋
有伺離生喜樂入初靜慮具足安住乃至第四靜
慮具足安住。如是漸次修行轉勝以上名爲修習
劣緣。從此已後爲令聖諦知斷證修。便於他音各
有堪能。發生作意等入諦現觀乃至般涅槃名
爲勝緣。此中不說初善法欲及正出家但說第三
戒律儀乃至第七正知而住。唯有五句。其此善法

欲及出家雖亦資糧道未是勝位。故論略之。其樂
遠離等三。是加行道之前方便。所以不說。或亦是
資糧道攝。此中具說爾許。次下論云。復有所餘進
修諸善等攝。其後三亦無妨難。其此尸羅攝彼出
家亦得彼白四羯磨等以爲出家。此中資糧加行
道名道諦者。六十四云。是資糧加行實是道諦世
尊有處唯說聖道以爲道諦。據最勝故。亦與此同。
此二道中無漏脫略。見諦聞熏資故。以前不資。卽
非也。取有漏不爲體。

加行道者。謂所有資糧皆是加行。或有加行非資糧

謂已積集資糧道者所有順決擇分善根謂煨法項法順諦忍法世第一法煨法者謂各別內證於諸諦中明得三摩地鉢羅若及彼相應等法由淨定心依諦增上契經等法於意言問諸義顯現緣彼所生奢摩他毗鉢舍那等是名煨法項法者謂各別內證於諸諦中明增三摩地鉢羅若及彼相應等法由彼頂法展轉增進居上位故順諦忍法者謂各別內證於諸諦中一分已入隨順三摩地鉢羅若及彼相應等法一分已入者於無所取一向忍解故一分隨順者於無能取隨順通達所依處故世第一法者謂各別

內證於諸諦中無閒心三摩地鉢羅若及彼相應等法從此無閒必起最初出世道故云何見道若總說謂世第一法無閒無所得三摩地鉢羅若及彼相應等法由無分別奢摩他毗鉢舍那等爲體相故。

第三見道有二初問後答答有三初明見道體相次明聖道輪後釋經說見道處義初中復二初明見道體後明見道真相差別若總說下初出體後又所緣能緣等下辨真相差別。

又所緣能緣平等平等智爲其相由此通達所取能取無性眞如故又遣各別有情假法假徧遣二假所

緣法智爲相。云何遣各別有情假所緣法智爲相。由此智於自相續中不分別我相故。不分別者是除遣義。云何遣各別法假所緣法智爲相。由此智於自相續中不分別色等法相故。云何徧遣二假所緣法智爲相。由此智於一切處無有差別。不分別我及法相故。

差別真相中有二科。若以一心爲正。初所緣能緣平等平等智爲其相。辨一心眞。又遣以下辨三心十六心假。若三心爲眞。初辨三心等。總是眞見道後十六智等爲相。眞中初總出體。竟俱以平等智

爲相。後顯差別。故說三心。又初如瑜伽說。一心事究竟故。據實而言。卽有三心。顯揚第十七成現觀品說見道。然三心已下有二段文。一云三心以前眞。後明相。然眞中三心菩薩眞。十六心菩薩相。若依二乘二品爲眞。但斷人執爲二品故。

復次。若別說見道差別。謂世第一法無間苦法智忍。苦法智。苦類智忍。苦類智。集法智忍。集法智。集類智。忍。集類智。滅法智忍。滅法智。滅類智忍。滅類智。道法智忍。道法智。道類智忍。道類智。如是十六種於諸聖諦中。法類智忍及法類智。是見道差別相。

明十六心相見道中有一初解相見道後結非實解相見道中有三。初列十六智。次別牒解釋。後於此位中由法忍法智等總料簡之。

苦者謂苦諦。苦法者謂苦諦增上所起教法。法智者謂於加行道中觀察諦增上法智。智忍者謂先觀察增上力故於各別苦諦中起現證無漏慧。由此慧故永捨見苦所斷一切煩惱。今於此中所說義者。謂於方便道中觀察依止苦諦所起契經等法如理作意所攝智增上力故於自相續苦諦中現證彼真如出世閒慧正見體生。由此慧故永捨一切見苦所斷三

界所繫二十八隨眠。是故名爲苦法智忍。苦法智者謂忍無閒。由此智故於前所斷煩惱解脫而得作證。所以者何。先由忍故永斷一切見苦所斷煩惱。令所依轉從此無閒。由如是智生證得轉依。是名苦法智。法智中言解脫而得作證者。雋師云。此寄相說。其證無爲解脫如前一心三心見道二說如前可知。今寄相言以法忍斷惑故以智爲證解脫非真實理。其類忍中此言緣法智諸論有言斷上惑者。如前會釋。

苦類智忍者謂苦法智無閒無漏慧生於苦法智忍

及苦法智各別內證言後諸聖法皆是此種類。所以者何。由初二種若忍若智是後一切學與無學聖法種類。從此彼得生故。是故無漏慧生各別內證緣。此爲境言。後諸聖法皆是此種類。是故名爲苦類智忍。苦類智者。謂此無間無漏智生。審定印可。苦類智忍。所以者何。由苦類智忍無間無漏智生。於苦類智忍內證印可。故名苦類智。如是於餘諦中。隨其所應。諸忍諸智盡當知。

別牒解釋中。有二。初明苦諦四智。後類餘三諦苦類智。忍中言後聖法皆是此類者。其修道無學道

中此智如何行相。不可言緣。後聖法是此類。此類如後得智。前因種類。故名。後得此。但緣智爲境。初後分成類。忍智。何必要須作此解相。或緣同類亦得。但知緣智智。今顯智緣如智之類故。

於此位中。由法忍法智覺悟所取。由類忍類智覺悟能取。所以者何。出世間道有二境界。謂眞如及正智。法智品道眞如爲境。類智品道正智爲境。由此諸忍智如實了知故。

總料簡文中分三。初釋法類智差別。次釋名無相觀者。後顯十六心刹那總名見道。此十六心是諦

觀行相攝法不盡。唯後得智收。不說緣餘事智故。又於此一切忍智位中說名安住無相觀者。如薄伽梵說第六無相住補特伽羅者。卽現住此忍智位中者是也。於此位中一切相皆不可得故。

第二釋名無相觀中分三。初論本解名無相觀者。次釋論引經證成。後別顯六種無相住。於此位中一切相等者。不同緣有漏有十相。此無男女等相。又無相住有六種。謂空無相。無願滅定有頂見道。此中無願等有頂等名無相者。無分別差別相。非一切全無。

論云。又無相住有六種。如文可知。如大論五十八云。隨信法行入見道。爲第六無相行。非信勝解見得身證。慧解脫俱解脫。五得其名。如備師云。此從下向上說。爲第六。非上從下。此乃雋師云所未見文。釋云。大論約人爲論。故言隨信法行入見道。此論約法爲論。直言見道。故無相違。未聞此中六種與彼六法不同。彼以人。此約法。故別也。彼云俱脫。慧脫身證。信解見得。隨信法行第六。此汎釋六種無相。彼約六行。卽究竟道二。修道三。見道一。此言第六無相見道。十六心皆是。彼言隨信法行者。準

下第十三法信行在已具資糧。卽在上品決擇分位。何故相違。答曰。彼隨信法行人。在見道。不取隨信。故此不同。問曰。下第十三言隨信法。在決擇分位。不入果差別。何故彼五十八云。入見道。與向說異。卽究竟道二。修道三人。見道一人。合隨信法。入見道。如毗婆沙云。以行相等。故合說。

如是十六心剎那。說名見道。所以者何。由如是忍智所攝。十六心剎那。於曾所未見。四聖諦境。各以四剎那見。故名爲見道。又心剎那者。謂於所知境。智生究竟名一剎那。非唯於本無。今有生時。名心剎那。何以

故。乃至於所知境。能知智生。所作究竟名一剎那。故如說苦應徧知。是一心剎那。如是集應永斷等。亦爾。解十六心剎那是論本文。下說爲四心等。是釋論師合爲四。又心剎那。進看文勢。總束爲一。準下結中。卽一一諦名爲一心。緣一諦究竟故。又如上說見道差別。皆假建立。非真實爾。何以故。出世位中。各別內證。絕戲論故。

結上段中三心爲真。由諸十六三心爲假。徧結三心。

云何見道。依此論及大論五十八。有一心見道。及

五十五顯揚十七有三心見道五十八復有九心見道此論下文復有十六心見道四心見道何以如此不同者西方二說一云其眞見道離戲論唯只一心如五十八說其三心等皆假說相見道何以名緣非安立諦云何言從世第一法生何用三心各皆言斷麤重十六心等復言世第一法生而何所因述曰引時證異故說不同其眞觀中唯一心是但以十九云聖者後得智離欲乃至得有頂卽六十九文勢似預流者亦得有頂無漏定何故不說得滅定此論唯說離三定下惑得六十九雖

不言得滅定以後得智伏無所有處下惑亦可得滅定唯識第七卷二說皆有證約彼初說對法且依彼人據實未離初定亦得據彼後說六十九通論第三果人非必初果六十九不言不還未離初定得滅定爲正唯識論天親攝論說唯識不還不還菩薩三乘無學唯此定故故知初菩薩前加行先學人觀後學法觀入眞觀中雙爲二觀後相見道前之二心學前加行第三雙觀放眞觀中又卽眞觀中人法各異麤細不同先學斷麤後方學細第三雙放義析眞如有異故有三心故菩薩相見

道三心不同。眞觀相難知。相觀相易說。義析眞觀。唯說三心。假言斷麤重。故言從第一法生緣。非安立諦。又爲十六心者。一菩薩相觀亦放前眞。前眞之中分義用異。無閒解脫道皆緣相分生。返照自體名自證分。故相見道法忍法智學前二道。類忍類智學自證分。但緣前心。類智雖緣忍生。可以擬學解脫道之自證。類忍準知學無閒道心自證。又二乘之人。加行作十六心觀。其入眞觀亦唯生空一心後相觀中。亦放加行。學眞觀者已如前說。亦以眞觀難說。但說相觀之心。假說爲眞。故言從世

第一法無閒十六心生。或十六心觀唯二乘相爲非菩薩作。其言九心者。於中三釋。一說謂四忍智品別有八心。忍智合論。故說爲四。類忍智亦然。復依一止說。故有九心。又說法智品有四者。旣云品言明非一定。此中意取四法忍。類忍亦然。合說忍數。故有八種。依法類智品復有八心。俱解脫道。故依一心說。唯說一心。故合有九。又說法忍智計合八心。斷下界惑。故合說爲四。類忍智品者亦八心。斷上界惑。故合說爲四。後重觀前十六心事。究竟故依一止說。唯說一心。總名九心。其四心者

此乃分諦而論非觀中爲四。至文可知。其此會釋
二家同此。第二說說三心爲眞見道者。卽取彼五
十五文緣非安立等爲證。後十六心是假相見道。
三心皆言斷麤重者。麤重有多種。今說無妨。思之
可知。云何五十八言一心文。釋曰。見道斷惑非如
修位作九品。見斷束煩惱爲一品。事究竟故。總名
一心。亦無妨難。諸餘相違。一如前說。

如諸論皆云。第三是類智。此言法智者。法類二種
義有多端。一斷緣上二界名類。斷緣下界名法。如
言法忍斷下惑類。忍斷上惑。二緣理名法。緣智名

類。如十六心依總相說。三別觀法名法。總觀法名
類。卽此相違者是也。依此三位思一切法。其言一
心家。三心旣爲相見解脫道。卽翻前者是。或別一
心緣解脫亦得。其三心家皆翻前名解脫。思準可
知。唯第三心亦法二釋。一別起一心爲解脫道。亦
得。或卽相見中苦法忍是。亦得。義理無違。又或說
苦法忍斷惑。世第一法生。等於眞觀中義說。亦得。
說相見道。亦得。如前說。一心見道家觀心解。唯一
品。此中爲一刹那爲多刹那相續。又二說。唯一刹
那。又亦多刹那。以事究竟故。三心家如何。問。此有缺文

又六十九云法智見道斷欲界惑類智見道斷色無色界惑此之會釋如前論無別法智斷上界惑但有總言法智爲無閒道法智三位如前應知準彼釋此應思類解彼論次文問一切類智現在前時皆能了別色界無色界耶答若有曾於上界諸法善取相者卽能了別若不爾者卽不能了別諸法師多以此文旣云曾習類智能了上界明知超越依類智斷若不爾者不能了別卽云初修行次第人以法智斷上界惑此理不然諸論皆無以法智斷上界惑文今言分別但以智緣事差別觀曾

修彼法以類智緣不曾習人不能了別但遮類智能了故言何必法智不曾習人遂緣上界其實法智斷三界惑類智但能緣法智生如此論下其言類智斷上界者此隨轉文非眞實理其入見道依幾地如大論六十九彼亦有依身處又唯依初未至及四靜慮非餘未至及無色如下釋更有餘文同雖有中間無漏不言入見道以遊觀無漏故梵王居多散故其依五地皆是那含依未至地唯初二果若得初禪依七作意必那含果以斷欲九惑故方得究竟其那含超越人等亦爾爲一觀斷修

惑。或當別斷。如此道理。至十二卷方解。

復次。一切道諦。由四種相應隨覺了。謂安立故思惟。故證受故圓滿故。安立者。謂聲聞等隨自所證已得。究竟爲欲令他亦了知。故由後得智以無量種名句。文身安立道諦。謂於諸諦中有如是如是忍。如是如是智。如是等思惟者。謂正修習現觀方便。以世閒智。如所安立。思惟數習。證受者。謂如是數習已自內證。受最初見道正出世閒無戲論位。圓滿者。謂此位後。圓滿轉依。乃至證得究竟。彼既證得究竟位已。復由後得智以名句文身安立道諦。如是四相真實道輪。

數數展轉相依而轉。無有斷絕。

道諦四相道法輪中。初安立。釋何須相見道所以。重觀眞位。擬後說。故乃至無學位亦爾。四輪中文。有三初標。次說後結。此意由聲聞等說。次學加行。次證次圓滿後復說之名輪。

四種道諦中云。聲聞以後得智說法。雋師二說。一卽無漏心說法。若爾身口之業亦應無漏。如菩薩以心無漏故。又釋此後得智種類名後得智。若爾無漏智中何故不說。今取後釋。以二乘劣故。無漏智不能說法。又身口有漏。非如菩薩以無漏智說。

身口業亦無漏故。釋經遠塵中分二。初釋三句經後釋九句經。二句初次卽後釋之。

如經言遠塵離垢於諸法中正法眼生者。此依見道說諸法忍能遠塵。諸法智能離垢。由彼最初於諸諦中妙聖慧眼爲自性故。法忍能遠塵者。由諸法忍永斷一切煩惱塵故。法智能離垢者。由諸法智已斷障垢依得生故。又於此忍智兩位。如其次第徧知故。永斷故。道得清淨。依此而說遠塵離垢。又經言見法得法極通達法究竟堅法。越度一切希望疑惑。不假他緣於大師教餘不能引。於諸法中得無所畏者。此亦

依見道說。於所化有情聖諦現觀無閒說故。見法者。謂諸法忍。由彼通達眞實法故。得法者。謂諸法智。彼於轉依能作證故。極通達法者。謂諸類忍。通達諸聖法。是此二類故。究竟堅法者。謂諸類智。於諸所知已究竟故。越度一切希望者。由諸忍智出世閒道。證得長夜所希聖果。於自所證無希慮故。越度一切疑惑者。於此位中於他所證無有猶豫。謂餘亦能證此勝位故。不假他緣者。於所修道中雖無他導引。自然善巧故。於大師教餘不能引者。於佛聖教已得證淨。雖轉餘生不爲邪道所化引故。於諸法中得無所畏者。

於依所證問記法中如惡欲增上慢者怯劣心永無有故。

初中初總後別釋。

引經遠塵離垢等者遠塵謂見道法忍。離垢謂法智。大論八十三忍智通修道。彼論文云謂見慢及我慢準義修道有不是明言修道。卽彼論中彼文亦解不作此言。更勘讀未見文。此約勝言見法。大論八十三有二復次說。前復次云見法者謂二忍。得法謂二智。達法謂見道無閒道。堅聖謂解脫道。後復次同此。如此引釋。并法師別記。勘五十三六

十三九十三并無此文。疏上亦無此釋。

又於此忍智兩位等者。徧知苦斷集。或逆次配無閒道。斷解脫道。知或無閒道。知解脫道。斷已斷故。大乘阿毗達磨雜集論述記卷第二十

